

nouvelle Eglise.

cherubins à costé du propitiatoire ? Car quant à nous nous sommes si loing d'idolatrie, que nous n'adorerions pas Iesus Christ mesmes, si ce n'estoit que nous scauons par foy que il est vray Dieu. Et nous n'adorons la Sainct Hostie pour autre cause sinon que pour autant que conformement à sa toute puissante parole, nous croyons que son corps y est, lequel estant vif, pour ce qu'vne fois estant ressuscité il ne meurt plus, il fault necessairement qu' avecques l'ame la diuinité y soit pareillement en vn suppost. Et par consequent, IESVS Christ se doit adorer comme Dieu, quelque part qu'il soit, soit ou ciel, ou en terre. Voylà ce qui empesche les bons Catholiques, et moy entre les autres des premiers, d'estre de vostre secte: Pource que nous semble que vous tenez par trop le party des Iuifs.

*1 Para. 28.*C iij^r

Cinquiemesme Poinct.

IL y a encores vn autre scrupule, qui nous fasche, et nous empesche de vous suyure. Car quand nous auons ouy toutes voz mocqueries et railleries des Catholiques, que vous appelez Papistes, nous venons bien souuent à recognoistre noz faultes. Et c'est le proffit qu'on vient aucunesfois à prendre de ses ennemis. Mais quand puis apres nous venons à regarder sur vostre maniere de viure, nous ne voyons pas que vous soyez plus gens de bien que nous. Mais qui pis est, on voit plusieurs qui du temps qu'ils estoient Catholiques viuoient honnestement et religieusement, et faisoient plusieurs bonnes operations: mais apres qu'ils sont vne fois sortiz de la bergerie de l'Eglise, se sont adonnez à tous vices. Et certes ce n'est pas de merueilles: car il semble que vostre but et scope, ne soit autre, sinon de lascher la bride à vostre sensualité, et de viure à vostre appetit, en vne liberté charnelle. Vous auez beau mettre le plus beau deuers la ville, si est-ce que quelques belles parolles que vous mettiez en auant, les effects n'y respondent pas. Et combien que nous ne soyons pas trop curieux, si est-ce qu'il se descouure beaucoup de choses, esquelles plusieurs de vous n'ont gueres

*Le but des
nouveaux
fideles est
de lascher
la bride à
toute liber-
té charnelle.*

C iij^v